

Buwire á wakita na a puwatertaa Paul ge emnde a KAURINTUS

Ga use á Paul

¹ Náwa wakita na yá aṅkwa á puwetá ba iya Paul, a eksisaa ba Dadaamiya áte namaari-aara, a give slebela á Yaisu *Almasiihu. Ná aṅkwa puwaná antara egdza emmemiya Timaute. Ná aṅkwa á puwakurte ge kure emnde a fetarfe am Kaurintus, antara emnde a fetarfe na tá am kwára á Akaya baɗemme. ² A magarakuránmaga tara Eddemiya Dadaamiya, tá antara Yaakadada Yaisu Almasiihu ṅgurna, a varakurteva hairire.

Dadaamiya á ekhyaná ervaunɗe ge ura kwakya am sarte á zlaɗa

³ Ususe ge Dadaamiya, Eddenjara ge Yaakadada Yaisu *Almasiihu. Dadaamiya wá, slemággwe áte emnde, sle-ekhyamiyá ervaunɗe ma vaatara keni. ⁴ Nane aṅkwa á ekhyamiyá ervaunɗe am zlaɗa-aha á miya baɗemme. Á magamiyá una ṅanna, geni miya keni mi ekhyaternaakhya ervaunɗe ge emnde umele, áte una a ekhyaminaa ṅane ge miya. ⁵ Almasiihu wá, ndza shushe zlaɗa kwakya. Njere keni ṅá aṅkwa á shá zlaɗa kina ba seke una ndza a shanaa ṅane. Daaci Dadaamiya keni aṅkwa á ekhyamiyá ervaunɗe

ba kwakya, adaba gamiyevge palle antara Yaisu Almasiihu. ⁶ Ma n̄ere n̄á an̄kwa á shá zlad̄a keni, ba geni kure kwá shánsha ndzed̄a, a lyakurselye Dadaamiya ma vaatara keni. Zlabe adaliye, máki Dadaamiya an̄kwa á ekhyan̄erá ervaun̄de ge n̄ere, ba geni a balasebale ervaun̄de á kure, kwá gevge emnde a farvaun̄de ge básha jeba á zlad̄a-aha n̄anna. ⁷ Baaka shaige á n̄ere def̄ekideki áte kure, diyan̄erdiya ganakini baaka mbed̄a á kure áte barama á Dadaamiya. N̄a disaa adaba kwa palle antara n̄ere am zlad̄a-aha. Daaci ma ba palle am ndzed̄a na á vamiťá Dadaamiya keni.

⁸ Daaci egdzar mama-aha-aaruwa, názena ni n̄á kataná n̄ere wá, n̄á kátá kwá diyeddiye zlad̄a yaikke na n̄a shuwaa n̄ere am kwárá á Aziya na. Shan̄erushe zlad̄a an tsáká ire. Ndza tamañerka def̄ekideki ganakini watse n̄á n̄já an shifa. ⁹ Una n̄á enndaha ba parakke, á ba áte vuwa á n̄ere keni ndza n̄a tapántápa ganakini watse n̄á njeka an shifa na. Mbate wá, Dadaamiya a magaa una n̄anna, ganakini a fan̄ertarka áte ndzed̄a á n̄ere, amá n̄á fetarfe á ba áte n̄ane. Adaba n̄ane wá, ma emtsaremtsa emnde keni, sletsatertetse ba n̄ane am fáyá. ¹⁰ Daaci a lyan̄ersaa ba n̄ane am zlad̄a yaikke n̄anna á kátá eksá shifa á n̄ere na. De katafke keni á de lyán̄erá ba n̄ane. Una ba jirire n̄á fá táma á n̄ere á ba áte n̄ane palle, diyan̄erdiya geni ma vaatara keni á de lyan̄erá ba n̄ane. ¹¹ Amá keni wá, naba melawan̄erumele an maduwa-aha á kure. Estuwa, emnde kwákya tá de melan̄erumele an maduwa-aha-aatare. Máki lyevaalya Dadaamiya

ɲála á miya, shamiyánsha barka-aara wá, watse emnde kwákya zlaɓe ádaliye tá de gálá ɲane adaba ɲere.

Pekyaapekya Paul ge de Kaurintus

¹² Náwa una dalila á higa á ɲere: ɲere wá, diyaɲerdiya am ire á ɲere ganakini shagera zláála á ɲere, baaka duksa mándzawe áte ɲere ɗekidɗeki, baaka ɗeme seke am ɗágave á kure. A vaɲertaa ba Dadaamiya una ɲanna, eɲkale á emndimagwahaka ɗekidɗeki, ba Dadaamiya una a maganeraa ɲgurna-aara. ¹³⁻¹⁴ Daaci am duksa na ɲá aɲkwa puwakurtá ɲere baɗemme na wá, ɲá aɲkwa ndaakurnda ba parakke áte una kwá dzegwándzegwa eccena-aara na. Aley, sem ba kina keni zlaɓe kwá cenevaaka elva á ɲere shagera. Yá tamaa ákatafke cekwaɲgudí wá, watse kwá diyeddiye baɗemme geni vaci sawa á Yaakadada Yaisu *Almasiihu wá, ervaunɗe á kure watse ba seke nama áte ɲere, náza á ɲere keni watse ba seke nama áte kure. ¹⁵⁻¹⁶ Adaba iya wá, ndza baaka shaige-aaruwa ɗekidɗeki áte duksa-aha ɲanna. Ndza ya kátá ba dezekure emtsaade, lauktu ma yá dem Makiduniya. Am tse-aaruwa am Makiduniya keni maa, ma yá eptsa á ba ásezekure ádaliye, ma andze kwá se meliwa ba kure ge mága shula-aaruwa á dem Yahudiya. Estuwa, ma andze yá naba melakurumele ser buwa.

¹⁷ Am sarte na fanakuremfa una ɲanna am vuwa, amá maganka na wá, ya ndaaná á ba áte we emtu? Estuweka ɗekidɗeki. Emtu am sarte na yá aɲkwa maga niya-aaruwa, ya magán ba seke náza á emnde a duniya emtu? Ya ndaase

«ane» á ba áte we emtu? ¹⁸ Yá ndaakur ba jirire, á katafke á Dadaamiya na á eptseka elva-aara dekideki na: Ndaanakurka á ba áte we, amá ya ndaana á ba an ervaunđe-aaruwa palle.

¹⁹ Adaba Yaisu *Almasiihu *Egdza á Dadaamiya na ɲa balakuraa elva-aara antara tara Silas an Timaute na wá, ɲane á ndaaka elva á ba áte we, ma vaatara keni á ndaa ba jirire. ²⁰ Baaka shaige-aara dekideki, ba ɲane una a njamiyante názena ni a baa Dadaamiya á de vamiteva na. Ba ɲane una *Aamin á miya á katafke á Dadaamiya, ge gálá zhera á Dadaamiya. ²¹ Zlaɓe ádaliye, a dzeramisaa ba Dadaamiya an ire-aara, aɲkwa á ndzedamítá ba ɲane an ire-aara áte barama á Yaisu Almasiihu. ²² Arge una ɲanna zlaɓe ádaliye, a vamite Shedekwe Cudedde am ervaunđe. Á maraná an una ɲanna ganakini miya wá, ma emnde-aara. Á maraná á ba an una ɲanna zlaɓe ádaliye geni duksa-aha umele na a baa watse á vamiteva na keni, watse mí shansha.

²³ Náwa Dadaamiya, a yiika an shifa máki ya magaa fida. Danka á dem Kaurintus na wá, ba ganakini yá ekhyakurnaakhya, a de zladanakurveka ervaunđe kwakya.

²⁴ Tatayanɲerka ɲere hyakuraare áte laarire ganakini sey kwá fetarfe. Adaba fetarfire wá, fakurtarfe zlauzle baaka arge una ɲanna. Duksa na ɲá kataná ɲere ázekure wá, ba mága slera átirpalle, ganakini kwá tapanaatápa emtakire-aara.

2

¹ Adaba una ɲanna, eptsanka á ba an niya

á dem ekse á kure. Ya naba njante geni yá eptseka ádezekure mázla-aara, geni a de zladanaturveka ervaunđe ádaliye. ² Adaba máki ya duwa wá, ba iya an ire-aaruwa keni watse emtanƙa ervaunđe-aaruwa. Baaka edda una á de ekhyiyá ervaunđe, adaba kure keni bademme watse á de zladá ervaunđe á kure. ³ Adaba una ƙanna, ya puwakurtaa ba wakita, arge una ma andze ya duwa ba iya an ire-aaruwa. Ma andze danemda wá, ma andze á de zladá ervaunđe-aaruwa kwakya áte kure. Emnde na ma andze tá de vitá itare higa keni ba kure ƙanna. Diyandiya ba jirire ganakini má emtake ervaunđe-aaruwa ge iya wá, kure keni á de higa ervaunđe á kure bademme. ⁴ Am sarte na yá anƙwa á puwakurte wakita ƙanna wá, ndza yá am dzámá ire jipu, ndza an zladá ervaunđe-aaruwa ba laaklaake, antara ba yáwe á kyuwa am hufe-aara. Bawánka zlaƙe a ba kure, ya kátá ba zladakurve ervaunđe an puwa-aaruwa ƙanna. Iya ya kátá kwá diyeddiye geni wayanakurwayire.

Paul anƙwa á yanaare haypa-aara ge edda á haypa

⁵ Diyandiya ganakini anƙwa slezladaná ervaunđe ge ura am dagave á kure. Amá diyaweddiye ganakini á zladiyán ge iya ka palle, amá ge miya bademme. Amá keni emtaka ba jirire, ge kure bademme ka. ⁶ Kwakya ba emnde na ta puwara elva na am kure, daaci yá tamaa hyaahya mázla-aara. ⁷ Kina wá, shagera ba kwá yanarye haypa-aara, kwá

ekhyannaakhya ervaunɗe geni a demka dzámá ire yaikke am ɗane, a keɗanaaka táma-aara baɗemme. ⁸ Aɗaba una ɗanna, táslawa á kure marawanánmára ba wáyáva mázla-aara. ⁹ Dalila na ni ya puwakurte wakita ɗanna wá, yá kátá diyeddiye átekwa, máki zlaɓe kwá á ba an fesarfire á kure áte ya, ge mága názena yá bakurná ya baɗemme. ¹⁰ Daaci máki kwá anɗkwa yanaare haypa-aara ge slehaypa ɗanna wá, naba yawanaarye, iya keni yá naba yanaarye haypa-aara. Una hyapka ba názara keni, yá naba yanaarye á katafke á Yaisu *Almasiihu geni a zlalavzlále njá á kure. ¹¹ Estuwa a shanka Shaitaine ndzeɗa arge miya. Aɗaba diyamidiya názena á kataná ɗane baɗemme.

Weshetewesha ire á Paul am Terauwas

¹² Daaci ya naba tse áhuwa, kwáye ya zlála á dem Terauwas ge de ɓálá labáre á higa, elva a Yaisu *Almasiihu áhuwa. Am sarte na danemda maa, ya náanna ganakini Yaakadada a weritaa baráma baɗemme ge ɓálá elva-aara áhuwa. ¹³ Amá wá, maganka, ndza an wesha ire-aaruwa baɗemme, aɗaba de beraneka egdza emmemiya Titus. Daaci ya naba magateraa ájamimá shifa ge emnde a fetarfe na tá am Terauwas ɗanna, ya naba fanuhe á dem kwára á Makiduniya.

*Shá midalire aɗaba barka Yaisu *Almasiihu*

¹⁴ Amá galaumigála Dadaamiya, aɗaba ndzeɗa na a ganaa Yaisu *Almasiihu na anɗkwa á vamite midalire ba kelaa wera á ekse. A puwamimaa ba ɗane am slera-aara ge ɓálá elva a Yaisu Almasiihu ma áme keni baɗemme. Daaci waazu

á miya gevge ba seke se á kajiji, hyemhye am slede bademme, geni a diyareddiye emnde Yaisu Almasiihu. ¹⁵ Ba jirire n̄ere wá, n̄a ba seke se á kajiji na emtake se-aara jipu na, á d̄izaná Yaisu Almasiihu á katafke á Dadaamiya. Adaba n̄ere n̄a emnde a hyanme elva a Yaisu Almasiihu am duniya bademme, áza emnde na tá áte uññule a lya, antara emnde na tá áte uññule a keḁa keni bademme. ¹⁶ Áza emnde na tá áte uññule a lya wá, n̄a emtake jipu, tá shá shifa am elva á n̄ere. Amá áza emnde na tá áte uññule a keḁa wá, n̄a emtañka ḁekideki, elva á n̄ere á teḁa shifa am itare ba ḁekideki. Ware edḁa una hyephye ge mága slera n̄anna an ndzeḁa á ire-aara? Baaka ḁekideki. ¹⁷ N̄ere wá, a belañeraa ba Dadaamiya ge mága slera n̄anna. Kwakya emnde tá tsakala an elva á Dadaamiya, amá n̄ere wá, gan̄erefka estuwa. Ná b̄alá ba elva á Dadaamiya an ervaunḁe á n̄ere palle á katafke-aara, adaba n̄a emnde a slera á Yaisu Almasiihu.

3

Maganaa slera ge Dadaamiya áte namána áñwaslire

¹ Emtu máki n̄a bakuraa una wá, watse kwá ban̄erá n̄a maga kurávire n̄ará emtu ádaliye? N̄ere wá, n̄a baaka an wedere á nalmesheri á seydire am erva ganakini kwá de diyañersá átekwa. Ge kure keni, n̄a ndavakuruka nalmesheri n̄anna ge dem tate umele an n̄ane. Tá maganá ba emnde n̄anna ka wá, n̄ere n̄a mañka, n̄a gergere. ² Adaba ba kure una kwa

nalmesheri á ñere, an puwa áte ñere. Ma ware keni diyaadiya una, tá dzegwándzegwa enndaha-aara geni ma ba estuwa antara kure am ervaunđe á miya. ³ Ba jirire, a puwetaa ba *Almasiihu an ire-aara wakita ñanna, a vañerte ge ñere. Amá wakita ñanna wá, a puwanaa an narkálam ka, a puwanaa an hákuma á Shedekwe Cufedde á Dadaamiya na ma vaatara keni Dadaamiya ñanna á ba aṅkwa na. Puwa ñanna keni a puwetaa áte naláwa-aha á nákwá ka, a puwanaa am ervaunđe á emndimagwaha.

⁴ Na ndaanaa adaba uneka, adaba ñere fañertarfe an Dadaamiya am duksa bademme, adaba Yaisu Almasiihu. ⁵ Diyañerdiya am ire á ñere ganakini ba ñere an ire á ñere wá, á daaka ndzedá á ñere ge mága slera ñanna, ñá maganá an ndzedá á Dadaamiya. ⁶ A gañervaa ba ñane emnde a slera-aara, geni ñá bálá namána-aara aṅwaslire na a ṅgudaterán ge emnde bademme na. Am namána aṅwaslire ñanna wá, seke shairiya-aha-aara na ta puwete am *tawraitá werre ka, á maganá Shedekwe Cufedde mázla-aara slera. Adaba tawraitá wá, slera-aara ba ceḃa emnde á katafke á Dadaamiya, amá Shedekwe Cufedde wá, á vaterte shifa ge emnde.

⁷ Werre wá, Dadaamiya ndza a puwete shairiya-aha-aara áte nalawa-aha á nákwá, ndza naranna emnde sleksire-aara keni am sarte ñanna. Dadaamiya a magaa sleksire-aara wá, wafke á Muusa á mbá wulwulire na baaka kalle-aara dekideki na. Emnde a *Iserayi-ila dzegwaránka zharaná á dem ice dekideki.

Parakkire ṅanna keni á de shekwaaka tsa. Máki *tawraitá na slera-aara ba ceba emnde á katafke á Dadaamiya ni, Dadaamiya a marse sleksire-aara am huḍe-aara estuwa wá, ⁸ sákwa máki á maganá Shedekwe Cufedḍe slera emtu, ṅane slevaterte shifa ge emnde? Á tsaame sleksire na á de maganá Dadaamiya! ⁹ Tawraitá wá, slera-aara ba puwa emnde á dem shairiya. Máki Dadaamiya a marse sleksire-aara estuwa am duksa na á puwa emnde á dem shairiya, sákwa am namána á Dadaamiya áṅwaslire na emnde tá shá jirire am huḍe-aara emtu? Á tsaame kena sleksire na aṅkwa á maraná Dadaamiya am huḍe-aara na! ¹⁰ Daaci mí naba bánba ganakini duksa na ni ndza Dadaamiya a marse sleksire-aara am huḍe-aara werre na wá, sleksire á Dadaamiya werre ṅanna hyepka ba názara keni, má mí sláterá an náza vatena. ¹¹ Duksa na Dadaamiya a vaterte ge emnde ba ge sarte cekwa, kerten dedde maa, Dadaamiya marsemáre sleksire-aara am huḍe-aara, sákwa am una á zleka ḍekideki na emtu? A jatermaa uwe?

¹² Ná aṅkwa á enndáhá ba parakke na wá, adaba faṅertarfe an duksa ṅanna geni jirire. ¹³ Muusa werre wá, ndza a puwem nalbuta am ice, adaba aṅkwa á gulá sleksire á Dadaamiya áte wafke-aara, daaci wayaaka tá diyeddiye emnde-aara emnde a *Iserayiila. Amá ṅere wá, ṅa baaka an wedere á mága una ṅanna mazla-aara. ¹⁴ Iserayiila-aha werre wá, ndza cenaránka maana á duksa-aha ṅanna ḍekideki. Ba duksa palle ge egdzara-aatare vatena keni. Máki tá

ndaha wakita á namána á Dadaamiya werre na, tá cenánka maana-aara defekideki, ba seke an fada enjkale-aatare an nalbuta á Muusa werre nanna. Adaba sey edda una lyevaalya *Almasiihu, lauktu á sesse enjkale-aara am nalbuta nanna. ¹⁵ Ba kina keni má itare tá ndáhá wakita-aha á Muusa werre wá, tá cenánka maana-aha-aara defekideki, ba seke an fada enjkale-aatare an nalbuta. ¹⁶ Amá anjwa an puwa am wakita á Dadaamiya, a ba nane: «Ma a semaa ware áseza Yaakadada keni, sey á sesse am nalbuta nanna.» ¹⁷ Daaci ba estuwa. Adaba tara Yaakadada antara Shedekwe Cudedde wá, ta ba palle. Daaci am tate na ni anjwa Shedekwe á Yaakadada wá, emnde nanna tá shánsha ire-aatare, á kwaraterka mázla-aara *tawraita. ¹⁸ Daaci miya kina wá, wafke á miya fadaaka an nalbuta werre nanna, má anjwa á nanna Yaakadada Yaisu Almasiihu am yaikkire-aara. Daaci ba kelaazare yaikkire á Yaakadada anjwa á gamive ba seke nane. Yaikkire-aara am miya anjwa á far ba máráva am miya ba kelaazare keni. Kwaya nane názena á maganá Shedekwe á Yaakadada am miya.

4

Baaka payda á nere ge nere amá anjwa ndzedá á Dadaamiya

¹ A zamivaare ba Dadaamiya lauktu a famiyar slera nanna. Adaba una nanna na ba dzañdzane am slera nanna. ² Diyamidiya miya wá, mí feka erva á miya á dem slera na tá maganá emnde an shebe, duksa á zherwe ba dey na.

Mí zlermeká emnde, mí feka fida á dem elva á Dadaamiya keni. Nere wá, nǎ vaterte ba jirire á Dadaamiya parakke ge emnde. Názena ni anǎkwa á tataya jirire á Dadaamiya wá, nane á diyeddiye jirire á n̄ere. ³ Labáre á higa na n̄a sanaa n̄ere na, tá cenanka emnde umele dekideki, ba seke an fádá enǎkale-aatare. Amá tá cenánka ba emnde na tá an kedá na. ⁴ Itare wá, anǎkwa á piyatertá Shaitaine, nane slemándzawe na á kwárá duniya na. Á piyaterter ganakini a naránka parakkire yaikke na á maraná elva a Yaisu *Almasiihu á dete itare. Parakkire n̄anna anǎkwa á mǎrá Yaisu Almasiihu am yaikkire-aara. Máki ura a naa nane, a naa ba Dadaamiya. ⁵ Nǎ bálá elva á ire á n̄erka, nǎ bálá elva a Yaisu Almasiihu, geni ba nane una Yaakadada arge emnde bademme. Nere wá, n̄a ba emnde a slera á kure ge melakurumele, adaba n̄a emnde a dǎba Yaisu. ⁶ Werre am fakta wá, a baa Dadaamiya: A gevge parakkire, á mbe am tabedammire. Kina keni ba Dadaamiya n̄anna una á mǎrá parakkire-aara á sem ervaunǎde-aha á n̄ere. Á maran̄erá yaikkire á Dadaamiya na anǎkwa á mbe áte wafke á Almasiihu.

⁷ Nere wá, n̄a ba seke gahe-aha na ta nderanaa an haha, amá wá, nǎ an rezegire yaikke na a van̄ertaa Dadaamiya na am n̄ere. Tá disá áte una n̄anna emnde, ganakini hákuma yaikke na n̄a shanaa n̄ere ge mága slera á Dadaamiya na wá, hákuma á n̄ereka, náza á Dadaamiya. ⁸ Tá anǎkwa á becan̄erbeca an zladá-aha gergere, amá zlan̄eraaka bademme. Ma a weshetaa estara ire á n̄ere keni, nǎ á ba an táma á n̄ere

am ervaunɗe. ⁹ Emnde tá anƙwa á shanjeru zlaɗa jipu, amá yánjeraaka Dadaamiya. Tá maganérá palása am haha, amá ɗere ɗá emtseka. ¹⁰ Kelaazare emnde tá tataya ba cebá shifa á ɗere seke una ndza ta jaa Yaisu *Almasiihu, amá náwa ba nja ɗere an shifa. Tá diyeddiye á ba áte una ɗanna geni Yaisu á ba an shifa-aara. ¹¹ ɗere emnde na zlaɓe ɗá an shifa am duniya na wá, ba kelaazare tá tsagwaɗanertsagwaɗa ge ceɓanɗerɗeɓa, aɗaba ɗa emnde a ɗáɓa Yaisu Almasiihu. Amá náwa ba nja á ɗere an shifa, ɗá an vuwa a laakire na á shekwaaka na. Tá diyeddiye á ba áte una ɗanna geni á ba an shifa-aara Yaisu. ¹² Amaana elva ɗanna wá, áte vuwa á ɗere wá, anƙwa á wawa ba emtsa, emtsa seke náza á Yaisu. Amá am kure wá, á maga slera ba shifa ánwaslire na kwa shanaa ázenjára na.

¹³ Anƙwa elva am wakita á Dadaamiya, a ba ɗane: «Fantarfe áte Dadaamiya. Aɗaba una ɗanna yá anƙwa á ɓálá elva-aara.» Daaci ba duksa palle ge ɗere keni, ɗere keni shanjeránsha fetarfire áte Dadaamiya; aɗaba una ɗanna ɗá anƙwa á ɓálá elva-aara. ¹⁴ Diyamidiya ganakini edda una a tsante Yaakadada Yaisu am fáya na wá, watse á tsamitetse miya keni, á kya erva an Yaisu. Baɗemme á miya watse á damiyá á ba átirpalle á de katafke-aara. ¹⁵ Baɗemme á duksa-aha ɗanna anƙwa á maganá Dadaamiya na wá, á maganá aɗaba ba kure, ge melakurumele, geni emnde kwakya a sharánsha ɗgurna-aara. Tá de hwiya estuwa emnde a slafanaa we ge Dadaamiya, emnde a gálá zhera-aara.

Baaka lámbe á ñere, ñere eñkale á ñere áte duksa na á zleka na

¹⁶ Adaba una ñanna, ña ba dzañdzañe. Diyañerdiya tsa geni añkwa á far ba gulá ndzedá á ñere ba kelaazare, amá am ervaunđe á ñere wá, ña emnde dzañdzañe jipu. Adaba Dadaamiya añkwa á fañerem ndzedá am vuwa.

¹⁷ Zladá wá, ñá añkwa á essha, amá watse á zlauzle. Añkwa yaikkire ñá de sháná ñere adaba zladá ñanna. Yaikkire ñanna keni watse baaka zle-aara, jauje ge duksa bademme. Máki yehañerteyeha una ñanna, ñá zhárá zladá á ñere kina hyapka ba názára keni. ¹⁸ Adaba eñkale á ñere áte duksa na á naaná ice ka, amá áte názena á nánka ice á urimagwe. Adaba bademme á názena á naaná ice á urimagwe watse á zle. Duksa-aha na ni á zleka ðekideki wá, tá zharaná an ice ka.

5

¹ Diyañerdiya ganakini má mbedáambeda bere á haha á ñere na ñá am huđe-aara kina, amaana vuwa laakire á ñere na wá, Dadaamiya á de vañerte bere umele áñwaslire am samaya. Amaana: á de vañerte vuwa umele am samaya, názá dem ba ge ðekideki. ² Njá á ñere am duniya kina na wá, laruwa jipu, ñá kumá ba daa á dem bere á ñere áñwaslire na am samaya na. ³ Adaba máki shañeránshá tsekwañeremtsekwa am vuwa áñwaslire na wá, shedekwe á ñere á gevka an ukhyiye dey mázla-aara á katafke á Dadaamiya. ⁴ Amá am kinire na zlađe ñá á ba am bere á haha á ñere na wá, ñá am zladá an

tsáká ire, á vanjerte ba kyuwa. Tatayanjerka njere ganakini njá kátá tsekweise am vuwa a laakire á njere njanna ba ðekideki. Estuweka. Njá kátá ma njá tsekwarhe una ánjwaslire, vuwa á samayire na, daaci ma andze á shebanveshebe emgyegwe-aara na njane á emtsa na. ⁵ A tsatsanjeraa ba Dadaamiya an ire-aara vuwa ánjwaslire njanna ge njere. A vanjerte Shedekwe Cudedðe na wá, á maraná an una njanna ganakini duksa na a baa watse á vanjerteva na wá, ba jirire watse njá shánsha.

⁶ Adaba una njanna, njere njá ba dzanjanje. Máki zlaðe njá á ba am vuwa laakire na wá, diyanjerdiya ganakini zlaðe njá yiyiye an tate na átekwa Yaakadada. ⁷ Kina wá, zlaðe njá nánka emtsaðe an ice á njere. Njá á njere antara njane wá, á ba an fetarfire. ⁸ Ba jirire ðaaka shaige á njere ðekideki. Máki njá shánsha njá tsekwe-setsekwe am vuwa laakire na, njá zláá ádeza Yaakadada wá, wayanjerwáyá jipu. ⁹ Duksa palle njá kataná njere wá, ma zlaðe njá á ba am duniya na, ma danjeraada ádezenjára keni, njá maga ba názena á kataná njane. ¹⁰ Adaba bademme á miya watse mí de katafke á *Almasiihu am yaikkire-aara, á de kyáná njane shairiya á slera-aha á miya. Ma ware á miya keni á de pelansá á ba áte názena ndza a maganaa edda-aara am duniya. Edda una a magaa shagerire, á de shá laða-aara. Edda una a magaa shagerkire an shagerkire-aara.

Dadaamiya á kátá emnde bademme tá melemela an njane

¹¹ Adaba una nanna, elva a fá zherwe áte Yaakadada wá, na dise vateneka ntere. Daaci ná ankwá á wava ba ge maraterá jirire á ntere ge emnde. Dadaamiya wá, baaka názu diyaaka nane am erwaunde á ntere. Yá tamá ba kure keni diyakuridiya, má kwá ndáhá jirire á názena kwa disaa kure áte ya. ¹² Emtu watse kwá banerá ná gálá ire nárá emtu ádaliye? Una ná gálá ireka, ná kwarakurse ba sera á elva, geni a njeka lambe á kure dekideki, naba fautarfe an ntere, kwá de shánsha dza sera, kwá de háslaterá ba kure emnde a gálá ire ba dey na. Adaba itare tá zhárá ba iga á duksa, baaka lámbe-aatare áte nja-aatare am erwaunde. ¹³ Emtu kure keni kwa ba seke emnde umele, kwá zharáner ba seke ná an shaitaine nárá emtu? Máki estuwa wá, na shaa shaitaine nanna adaba ba Dadaamiya. Amá ba lápiya ire á ntere. Daaci an enkale á ntere nanna wá, ná melakuru ba ge kure an nane. ¹⁴ Dalila á slera á ntere wá, ná maganá adaba wáyávire yaikke na a magaminaa *Almasiihu na. Nane a naba yaa ire-aara, a emtsehe adaba emnde bademme. Daaci áza Dadaamiya wá, bademme á emnde emtsaremtsa kerde antara Almasiihu. ¹⁵ Labára Almasiihu a emtsaa adaba emnde bademme? A emtsaa adaba itare, geni ma tá á ba an shifa-aatare keni, tá magán ge ire-aatare ka duksa, tá maganá áte namaari-aatare ka mázla-aara duksa, amá tá maga ba názena á kataná nane, adaba nane a emtsaa adaba itare, tsetse am fáyá keni adaba itare.

¹⁶ Daaci kina wá, gergerka emnde ázenere mázla-aara, emnde bademme ta ba kalkale, ná

zháreka názena ágáshe. Werre wá, ice na ndza ña zhárá *Almasiihu an ñane na wá, ndza ñá maga ba slera á emndimagwaha. Amá kina wá, ñá mañka mázla-aara. ¹⁷ Edda-aara máki garevge palle antara Almasiihu wá, ñja-aara werre baðemme dedde, ma jeba-ara-aara keni gevge añwaslire baðemme.

¹⁸ Baðemme á una ñanna, a maganaa ba Dadaamiya. Ñane a ðelaa Almasiihu, a se melamiyaahe an ñane. Daaci a famiyar slera ñanna ge miya, geni á kátá emnde baðemme tá shánsha mele an ñane. ¹⁹ Amaana wá: Dadaamiya a ðelaa Almasiihu á sem duniya, aɗaba á kátá emnde baðemme tá melemele an ñane. Á ñaterka am ervaunɗe mázla-aara aɗaba haypa-aha-aatare. Daaci a famiyar slera á de ðalaterá una ñanna ge emnde baðemme, geni añkwa baráma a mela an Dadaamiya.

²⁰ Daaci ñere wá, ña we á Almasiihu, á ɗahákurá ba Dadaamiya an ire-aara á kya an we á ñere. Ná añkwa á magaterá ba tásle ge emnde aɗaba barka á Almasiihu, táslawa á kure eksawarekse ganakini kwá melemela an Dadaamiya. ²¹ Almasiihu ñane maganaaka haypa ɗekideki, amá Dadaamiya a naba far haypa-aha á miya ge ñane, ganakini á gamivege miya ma emnde a jirire á katafke-aara, má gamiyevge palle antara Almasiihu.

6

*Slera á sleɓela á Yaisu *Almasiihu*

¹ Náwa nǎ aṅkwa á bakurá elva: Nere wá, nǎ emnde na ni Dadaamiya aṅkwa á maga slera-aara á kyá erva an nǎ. Dadaamiya wá, magakuránmaga ngurna. Táslawa á kure, gawanveka ngurna á Dadaamiya na seke duksa ba dey. ² Ábi bánba Dadaamiya aṅkwa an puwa am wakita-aara, a baa nǎne:

«Am sarte na hyephye sarte á ngurna-aaruwa, ya cenakvaarcene.

Am sarte na hyephye sarte-aaruwa ge lya emnde, ya melakumele.»

Daaci diyaweddiye ganakini sarte á ngurna nǎna ba una, sarte á lya emnde nǎna ba una.

³ Wayaṅerka nǎre vante ektápaare ge ura, wayaṅerka an duksa mándzawe am slera á nǎre dǎkideki. ⁴ Názena nǎ kataná nǎre wá, nǎ kátá tá diyaṅereddiye emnde ganakini nǎ emnde a slera á Dadaamiya. Una názena nǎ maganá nǎre am duksa bademme. Ma nǎ aṅkwa á shá zladǎ yaikke, ma nǎ am emtaṅkire, ma kwakya palása na nǎ maganá nǎre keni, ba nǎ farvaunǎde, nǎ ebbásha. ⁵ Ja keni hyaṅerhya áza emnde, á dem daṅgay keni daráṅerda, ervaunǎde á zlamaa bademme keni tsarantetse áte nǎre. Máki ba slera wá, wavaṅerwava an nǎne. Am sarte umele ba háre keni nǎ puka, zu náza za keni baaka dǎkideki. ⁶ Nǎ aṅkwa á marateránmára ba parakke ge emnde ganakini nǎ emnde a slera á Dadaamiya. Diyaṅerdiya jirire á Dadaamiya, nǎ aṅkwa nǎ ba cudǎdǎde, nǎ farvaunǎde am duksa bademme, nǎ aṅkwa á maga kemaarire, Shǎdekwe Cudǎdǎde keni aṅkwa an nǎre, nǎ

anƙwa á maga wáyávire an ervaunƙe á ƙere palle, ⁷ nǎ anƙwa á magaterá waazu á elva a jirire ge emnde, anƙwa á vanjerteva Dadaamiya hákuma-aara. Kazlaƙa á wáva á ƙere ge ƙere wá, ba mága jirire. Ma ge wava keni á ba an ƙane, ma ge lyá ire á ƙere keni á ba an ƙane. ⁸ Emnde umele tá zlebanjerzleba, emnde umele tá epsawanjerepsawa. Emnde umele tá galanjerǵalá, emnde umele tá zlazlanjerzlázle. Emnde umele tá zharáƙer ba seke ƙa emnde a fida, amá ƙa emnde a jirire tsa. ⁹ Tá zharáƙer ba seke diyaranjerka, amá diyaranjerdiya tsa emnde baƙemme. Emnde tá zharáƙer ba seke irekhya-aha, amá baaka duksa umele áte ƙere, ƙa ba lapilayye. Tá shanjeru zlaƙa an tsáká ire, amá nǎ emtseka, náwa ba nǎ á ƙere an shifa. ¹⁰ Emnde tá kátá tsekwanaatsekwa higa á ƙere ba ƙekideki, amá ma vaatara keni ƙere nǎ á ba an higa á ƙere. Nǎ ba talage-aha am duniya na, amá nǎ gatervaa ba ƙere emnde, tá gevge emnde a berba an elva á Dadaamiya. Emnde tá zharáƙer ba seke baaka duksa á ƙere, amá baaka názu ektsanjerarektse ƙekideki.

¹¹ Kure emnde a Kaurintus wá, ƙa ndaakurndáhá ba parakke, shebanjerakurvuweka názu am ervaunƙe á ƙere ƙekideki. ¹² Nere wá, nǎ wayákurá an ervaunƙe á ƙere palle, kwa yanjeráa ba kure. ¹³ Ázerwa wá, kwa ba seke egdzara-aaruwa, iya keni ya ba seke eddekure, yá ndaakur elva. Kure keni shebawanjerwuweka názu am ervaunƙe á kure, wayawanjerwáyá ba seke una ƙa wayakuraa ƙere.

Faufa hyema, gawevka palle an emnde na fartarka

¹⁴ Kure wá, gawevka am sawari palle antara emnde na fartarka Yaakadada na, una zlayeka ge kure dekideki. Tá másláva estara tara jirire á Dadaamiya an haypa? Tá njá estara tara parakkire, antara tabedammire am tate palle?

¹⁵ Á duwa estara elva á tara Yaisu an Shaitaine? Á duwa estara sawari á tara slefetarfe an edda una fetarka? ¹⁶ Tá másláva estara tara mashidi á Dadaamiya antara hele á shaitaine? Yá ndaakur ba jirire: Ba miya una mi mashidi á Dadaamiya na ma vaatara keni ñane á ba anƙwa na. Ba seke una a ndaanaa ñane anƙwa an puwa am wakita-aara, a baa ñane:

«Watse yá njá á ba am dágave-aatare, yá njá antara itare.

Yá de gev Dadaamiya-aatare, itare keni tá de gev emnde-aaruwa.

¹⁷ A ndaanaa adaba una ñanna Yaakadada Dadaamiya zlaɓe adaliye, a ba ñane: Sawesse am dágave-aatare, gawevka palle antara itare, njawinja cufedɗe, lauktu yá liyakurlyiya;

¹⁸ Yá de gev Eddekure, kure keni zála an ñwásha baɗemme kwá de gev ba egdzara-aaruwa.

Kwaya ñane elva á Yaakadada na hákuma baɗemme á ba ázeñará na.»

7

¹ Baɗemme á waada-aha ñanna a maganaa Dadaamiya na wá, a magamiyán ba ge miya egdzar mama-aha-aaruwa. Adaba una ñanna,

barawamiyaabará ire á miya cufedfe. A jerka duksa na ni á badza shifa á miya, antara vuwa á miya dekideki am zlaláva á miya, adaba ma emnde a fa zherwe áte Dadaamiya.

Tara dzámá ire, antara higa á Paul

² A yanjeraaka ervaunde á kure ba dey, adaba baaka emtanpire na na magakurtaa nere ba ge palle á kure keni. Baaka edda una nere na maganaa ektapaare am kure dekideki, baaka edda una na zlermuwa nere dekideki am dagave á kure. ³ Bawánka zlafe ganakini ná kátá fakurar ba zherwe an elva na ná ankwa á tsakaná nere, una ka dekideki. Ba kina keni ya zluwa á ndaakur ba nane ganakini na wayakurtaa an ervaunde á nere palle. Baaka názu á pekyamiya an kure dekideki. Una ma zlafe ma á ba an shifa á miya, ma zlauzle shifa á miya am duniya na keni. ⁴ Baaka shaige-aaruwa áte kure dekideki. Bademme á higa-aaruwa á ba áte kure. Bademme á zlada na ya shuwaa ya na, aley yá á ba an higa-aaruwa am ervaunde.

⁵ Zlada wá, ba jirire shanerushe. Á ba am Makiduniya keni se shaneránka hairire dekideki. Ma á kyá ura-ara keni á sawa ba shunqula, emnde tá dabanerá á ba an elva. Ekhyaaka ervaunde á nere dekideki, ná dzámá ba ire. ⁶ Amá sle-ekhyaterá ervaunde ba Dadaamiya ge emnde, máki weshetewe-sha ire-aatare. Daaci a ekhyaneraa ba nane ervaunde an sá á Titus. ⁷ Dadaamiya a ekhyaneraa ervaunde an sá á Titus ka palle, a ekhyaneraa ervaunde an elva na a melanuwa

ɲane ge Titus ge tsakanɲersetsake na. Adaba se tsakanɲersetsake Titus ganakini ekhyakurnaakhya ervaunɲe ge ɲane keni. Zlabe ádalíye, a ndaanɲernda ganakini kwá an wedere-aaruwa jipu, dakuremda am nambane arge názena kwa maganaa kure. Kina wá, bademme kwa á ba am iga-aaruwa, kwá anɲkwa á waviyuwave. Labáre á kure higitehiga jipu zlabe ádalíye.

⁸ Diyandiya ganakini wakita na ya puwakurtaa ya na, a de vakurte dzámá ire kwakya, amá ba kalle. Yá kátá dem am nambane geni ma yá puwakurteka estuwa, adaba ya nanna ganakini puwanakurempuwa am dzámá ire kwakya. ⁹ Amá kina wá, ekhyaakhya ervaunɲe-aaruwa. Yá higa adaba ya puwakurme am dzámá ire ka, amá adaba kwá anɲkwa dzámá názena ndza zlalaaka an unɲule-aara na, eptsakureptsa am tuba. Dzámá ire á kure áte namaari á Dadaamiya. Daaci máki estuwa, baaka emtanɲkire na ɲa magakurtaa ɲere dekideki. ¹⁰ Máki tá am dzámá ire emnde áte namaari á Dadaamiya wá, dzámá ire ɲanna shagera jipu. Adaba jeba á dzámá ire ɲanna á dá ura á dem tuba. Daaci estuwa, Dadaamiya á lyelye edda-aara. Amá dzámá ire áte náza á emnde duniya wá, á saná ba emtsa ge ura á katafke á Dadaamiya. ¹¹ Yá ndaakur ba jirire: Dzámá ire á kure ndza áte una á kataná Dadaamiya. Nawanaana ba kure keni slera na a maganaa Dadaamiya am kure am sarte na kwá am dzámá ire ɲanna! Nawanaana wáva á kure ganakini kwá kátá bára ire á kure am elva ɲanna! Nawanaana emtsaade ganakini

ba kure keni anƙwa á wakurwá am ervaunƙe mázla-aara! Kwá anƙwa á tapanaatápa emtu lyáwa á kure, antara wedere á kure an iya kina! Nawanaana emtsaade wáva á kure kina, geni kwá kátá namaari á Dadaamiya! Nawanaana emtsaade shairiya na kwa far ge edda una a magaa shagerkire! Kwa nanna emtu ganakini baaka názu magakurka geni kwa baaka am elva nanna mázla-aara kwá an bára?

¹² Daaci diyaweddiye ganakini puwanakurteka wakita nanna adaba edda una a gu haypa, bi adaba edda una ta ganu haypa, una nanna ka palle. Ya puwakurte ganakini yá yehakuranteyeha bademme ákatafke á Dadaamiya, wáyáva á kure yaikke na kwa wayaneraa kure an ervaunƙe á kure palle na. ¹³ Adaba una nanna, kina wá, ekhyakuraneraakhya ervaunƙe mázla-aara.

An ekhya ervaunƙe á nɛre ba parakke! Názu a ekhyaneraa ervaunƙe zlabɛ ádalɛye kwakya-aara wá, Titus a se beranɛrá an hɛga yaikke, adaba bademme á kure fakuranemfa ndzedá am vuwa. ¹⁴ Am sarte na yá anƙwa belaná ádezekure wá, ya zlebakurzleba jipu ázenára. Kina wá, yá anƙwa á nanna ganakini zleba nanna ya zlebakuraa ya na wá, fakuriyemka am zherwe. Bademme á elva-aha emtake emtake na ya ndaanaa ya áte kure na gevka fida. Daaci bademme á názena ndza na banán ge Titus áte kure na, jirire. ¹⁵ Ba kelaa má yeheteyeha Titus názena kwa magannaa kure am sarte na a tsekwaá ázekure, kwa lyevaáhe am dáɛgave á kure, kwa gyaigarhe, kwa fansarfe keni am

názena a de bakurnaa ñane baɗemme na wá, higa-aara áte kure á far ba wala ba kelaazare. ¹⁶ Daaci yá higa jipu, aɗaba baaka shaige-aaruwa ɗekiɗeki áte kure ma am uwe keni baɗemme.

8

Elva á náza melateru ge emnde na tá am baakire

¹ Egdzar mama-aha-aaruwa, ñá kátá kure keni kwá cenáncena názena ta maganaa emnde a fetarfe am kwárá á Makiduniya na. A mag-aternaa ba Dadaamiya ñgurna á maga duksa ñanna. ² Sharushe zlaɗa an tsáká ire, amá baaka názu a eksanaa zlaɗa ñanna áte itare ɗekiɗeki, higa-aatare ba kelaa-aara. Ta talage-aha jipu, amá ta jemaa sadake-aatare ba kwakya. ³ Yá ndaakur ba jirire: Jaranmejahe ba kwakya, mag-arnaamaga ba seke ta jahanaa itare ka ɗekiɗeki, hyahya ndzedá-aatare. Ndza ta sawa ba itare an ire-aatare ásezeñere, ⁴ ta se ndava baráma, ganakini itare keni tá demda am slera á melateru ge emnde a fetarfe na tá am kwárá á Yahudiya na. ⁵ Emnde ñanna ta magaa názena tamanjerka ñere ɗekiɗeki. Emtsaade, duksa zuññwe na ta maganaa itare wá, ta gaa ire-aatare ákatafke á Yaakadada, lauktu ta se ganaahe ákatafke á ñere keni. Baɗemme ta maganaa á ba áte namaari á Dadaamiya.

⁶ Amá ázekure keni fakurantaufe zlauzle, a dakurnaa Titus sawari-aara. Aɗaba una ñanna maa, ñá anƙwa á ndavanundave zlaɓe adaliye kina, geni a eptseptsá ádezekure, á de zlanazle slera á jirire na a fantuwa ñane am dáɗave

á kure na. ⁷ Ate baráma á Dadaamiya wá, kure hyaikurephye am duksa bademme. Ma fetarfire á kure, ma ge ndáhá elva á Dadaamiya, ma enjkale á kure ge dise ndaha elva, ma mága dzañdzañire am slera á Dadaamiya keni bademme. Wayakurañerwáyá an ervaunđe á kure palle. Daaci yawánka mága slera á jirire ñanna keni, magaumága an ervaunđe á kure palle.

⁸ Názena yá bakurná ya na wá, gevka laarire ganakini sey ba kwá fá sádake ñanna. Una yá vakurte ba seydire áte emnde na itare wayarwáyá jipu slera ñanna, itare tá añkwa á effá na. An una ñanna wá, yá kátá diyeddiye máki añkwa wáyáva á kure áte emnde umele.

⁹ Duksa palle wá, kure diyakurdiya ñgurna yaikke na a magakurnaa Yaakadada Yaisu *Almasiihu. Ñane, bademme á duksa á ba am erva-aara, amá a ganve ire-aara talaga adaba kure. A magante una ge ire-aara, geni kure kwá gevge emnde a berba áte baráma á Dadaamiya.

¹⁰ Kina wá, yá ndaakurse názena yá slakurvá ya: Mbakiya wá, ndza kwa hayanaa ba kure zuññwe mága slera á jirire ñanna, kwa fantuwa ba kure zlafe adaliye zuññwe ge emmága-aara keni. Kina keni wallá laarire, wallá uwe, shagera ba kwá zlanazle slera ñanna fakurantaufe zlauzle na. ¹¹ Daaci yawánka, naba zlawanaazle slera ñanna an higa, ba seke una kwa fantuwa an ñane na. Faufa á ba áte názena kwa dzegwanaa kure. ¹² Adaba má kwá vante duksa ge Dadaamiya deydey á ndzedá á kure, kwá vante an higa wá, á ellyiya Dadaamiya.

Dadaamiya á ndava ba una aṅkwa am erva á kure. Nane á ndavakuruka názena baaka am erva á kure na.

¹³ Bawánka zlaɓe a ba kure: Paul á kátá puwaṅerem am zlaɗa á emnde ṅanna, itare tá de shá ire-aatare. Una ṅanna ka ɗekidɗeki. Yá kátá emnde baɗemme tá gevge palle. ¹⁴ Kina wá, aṅkwa duksa ázekure, shagera jipu máki ká vaterteva ge emnde na tá am baakire kina, daaci mákuralla má watse baaka ázekure, amá aṅkwa ázetare, itare keni tá de vakurteva ba estuwa. Máki estuwa, baɗemmire á kure kwa ba palle.

¹⁵ Máki estuwa, gevge á ba áte una aṅkwa an puwa am wakita á Dadaamiya a ba ṅane:

«Emnde na tá hálá ɗáfá á samaya na, halar-vaahála kwakya, gevka seke kwakya ba ta zuhe á dem huɗe ṅanna.

Emnde na ta halante ba cekwaanḡuɗi keni, ta yanaa ba itare náza za.»

Titus antara emnde a puwansepuwe

¹⁶ Ná aṅkwa á slafaná we á ṅere kwakya ge Dadaamiya, aɗaba a maganaa ba ṅane slera am Titus. Nannára aṅkwa á wawa Titus ba seke ṅere ge melakurumele na. ¹⁷ Na ndavanu ganakini a eptseptsá ádezekure, a naba eksarhe. Aɗaba ndáva á ṅere ka palle, amá ba ṅane an ire-aara keni wayaawáyá ervaunɗe-aara ge eptsá ádezekure, ge de melakurumele zlaɓe áɗaliye.

¹⁸ Náwa ṅá aṅkwa á belante egdza emmemiya umele, tá aṅkwa á duwa kerɗe. Egdza emmemiya ṅanna wá, emnde a fetarfe baɗemme tá zleba ba ṅane aɗaba waazu na aṅkwa á

balaná ñane. ¹⁹ Zlaḅe ádaliye, aḁaba ta eksesaa emnde a fetarfe, ganakini á ḁabáñerá ñane am shula-aha á ñere, a melañerumele ge mága slera á jirire ñanna. Daaci slera ñanna á de maga námpire kwakya, emnde kwakya tá de gálá Yaakadada á miya am yaikkire-aara. Tá de dise áte una ñanna emnde, niya á ñere ge melateru ge emnde.

²⁰ Shunḡu wá, jañeranmejaha ba kwakya. Njá anḡwa á fá hyema keni ba kwakya am slera á shunḡu ñanna, geni a tsalaraanerka emnde aḁaba shagerkire á mága. ²¹ Njá kátá á baraavebárá shagerire na ñá maganá ñere na á katafke á Yaakadada, amá a baraavebare áza emnde keni. ²² Náwa ñá anḡwa á belaterte egdza emmemiya umele ge emnde buwa ñanna. Ñane keni marañeránmárá wáva-aara ser kwakya, ña nanna ganakini wayaawáyá an slera á Dadaamiya. Kina ḁeme cenáncena labáre á kure, geni shagera zláláva á kure wá, anḡwa á wava jipu ge de melakurumele. ²³ Titus wá, ñane edda una ñá anḡwa á ja ḁábá kerḁe ge mága slera á Dadaamiya am dáḡave á kure. Amá emnde buwa na tá anḡwa á duwa antara ñane na wá, ta belateraa emnde a fetarfe baḁemme ádezekure. Emnde kwakya tá anḡwa gálá *Almasiihu aḁaba barka á slera-aatare. ²⁴ Marawateránmárá wáyáva á kure ge emnde ñanna. Daaci baḁemme á emnde a fetarfe na tá duwa ádazetare ge dezekure na, tá de cenáncena labáre á kure, tá de dise áte una ñanna ganakini zleba na ña zlebakuraa ñere na wá, an unḡule-aara.

9

Dadaamiya a hayaa ba edda una á fáná an higa

¹ Ate elva a náza melateru ge emnde a fetarfe na tá am Yahudiya wá, baaka deme wedere kwakya ge puwakurte elva ñanna áte nalmesh-eri. ² Adaba diyandiya ganakini ba kure an ire á kure keni kwá an wedere á melaterumele. Zlebanakuraazleba ya zlauzle áza emnde a fetarfe na tá am Makiduniya, geni emnde a fetarfe na tá am kwará á Akaya wayarwáyá jipu melateru ge emnde a fetarfe na tá am kwará á Yahudiya. Kwaye mbákyiya tá maga ba niya-aara. Daaci wáva á kure a tsante wayava á emnde kwákya am Makiduniya, itare keni kwakya ba názena á kátá melaterumele na.

³ Ñannára yá anƙwa á bela tara Titus antara egdzar mama-aha a miya umele buwa ádezekure, geni kwá zlauzle am slera á kure bademme ge jáha shungu ñanna, lauktu njá daada ñere. Estuwa, zleba na ya zlebakuraa ya ázetare na á gevka fida. ⁴ Adaba máki danjeremda antara emnde a Makiduniya, ña de berakur zlaɓe baaka názena kwa maganaa kure wá, watse zherwe ge ñere, adaba ña bateraa baaka shaige á ñere áte kure. Názá á kure deme wá, náza ndaaka. ⁵ Daaci yá puwa sawari am ire-aaruwa wá, a ba ya duksa na wá, shagera ba yá ndavaterundave ge tara Titus antara emnde buwa na, geni a darduwa itare zunñwe, lauktu watse njá dábaterá ñere vacite umele. Yá kátá kwá maganaamaga antara itare

duksa á barka na ndza kwa enndaa na, lauktu ñá daada ñere. Daaci una ñanna á de mǎrá názena am ervaunǎde á kure, geni kwa maganaa á ba an kátire á kure duksa á barka ñanna, gevka laarire.

⁶ A ba naraje umele wá: Edda una a herǎfante ba cekwaanǎgudí, á sem mbá keni, á sá ba cekwaanǎgudí. Edda una a herǎdaa kwakya wá, á sem mbá keni, á sá ba kwakya. Viyawanaaka naraje ñanna ðekidǎeki. ⁷ Magaumága kwa mazla-aara. Ma ware keni a emmága áte una a ekseaa ñane. Fauka an dzámá ire, a gevka laarire keni. Faufa á ba an higa, adaba Dadaamiya á háyá ba edda una á fáná an higa. ⁸ Dadaamiya an hákuma ganakini á kwakyakuranvekwákýe duksa baǎemme, á juwá á ba áte kure, kwá hyephýe zlaǎe ádaliye ge mága slera á shagerire baǎemme. ⁹ Estuwa, kwá gevge áte una anǎkwa an puwa am wakita á Dadaamiya, a ba ñane:

«Ura mággwe wá, pasakpasakke erva-aara áza talage-aha. Maggwire-aara á zleka ðekidǎeki.»

¹⁰ Baǎemme á wulfe á duksa na tá jáná emnde á dem haha, á walantá ba Dadaamiya, á vatertá ba ñane náza za-aatare ge emnde, antara wulfe na tá de jáná am shifa á ayiye keni. Una keni ba duksa palle. Máki kwá maga shagerire an názena am erva á kure wá, kwá de shánsha zlaǎe ádaliye ba kwakya; ma vaatara keni kwá de maganá ba kure zlaǎe ádaliye shagerire, shagerire á kure á de maga nampire kwakya.

¹¹ Dadaamiya á de gá barka áte názu am erva á

kure bademme, geni kwá magateránmaga zlaɓe ádaliye shagerire ge emnde, á de katafke. Daaci emnde kwakya tá de gálá Dadaamiya adaba duksa á barka na kwá anƙwa vatertá kure ge emnde ɗanna á kya erva an ɗere.

¹² Adaba slera á barka ɗanna kwá maganá kure na wá, gevka ni sey ba ge zatervaare ge emnde á Dadaamiya, amá emnde kwakya zlaɓe ádaliye tá de gálá Dadaamiya adaba ɗane.

¹³ Slera á barka ɗanna kwá de maganá kure na wá, á de maraná una ɗanna shagerire á ervaunɗe á kure, tá de diyakursá áte una ɗanna emnde, ganakini lyakurvalya labáre á higa, elva a Yaisu *Almasiihu na á ba an jirire, kwá anƙwa á fansarfe á ba an jirire. Daaci emnde kwakya tá de gálá Dadaamiya adaba ɗane. Zlaɓe ádaliye, tá de galaná adaba shagerire na kwá de magaterán ge itare, antara ge emnde umele keni bademme na. ¹⁴ Bademme á una ɗanna, watse kwá maganá an ndzedá á kure ka, á de magakurná ba Dadaamiya ɗgurna-aara. Má de sesse shagerire á kure parákke áza emnde wá, tá de hayakurhayá, tá de melakurumele zlaɓe ádaliye an maduwa. ¹⁵ Amá galaumigálá Dadaamiya adaba duksa yaikke na a vamitaa ɗane, baaka názena mí slátera an ɗane.

10

Paul á ndáhá elva a hákuma na a vantaa Dadaamiya

¹ Kina wá, iya Paul yá kátá ndaakurse elva-aaruwa palle. Kwa bantsa kure: Máki yá am

dágave á kure wá, ya tsekadde, amá máki ya yiyiye an kure wá, ya danɗaɗe. Adaba barka á martaapire, an kemaarire á *Almasiihu wá, ² wayanka yá gev danɗaɗe. Táslawa á kure, yáwánya jeba á mága á kure na. Máki yakuránka wá, má danemda watse baaka hairire am dágave á miya. Iyau, emnde na ta bantsa itare maganka jirire, yá maganá áte slera á duniya na keni maa, diyana ba iya názena yá de maganá an itare. ³ Ge jirire wá, ɗa ba emndimagwaha, amá wáva á ɗere wá, áte názá á emndimagwaha ka mazla-aara. ⁴ Adaba kazlaɗa á wáva na ɗá wava ɗere an ɗane na wá, gevka kazlaɗa á wáva á emndimagwaha, á vanertá Dadaamiya kazlaɗa á wává á ɗere. Kazlaɗa á wáva á ɗere an ndzedá jipu, á dzegwándzegwa kyábá dala yaikke na tá an shabe am huɗe-aara kelaade-aha á Dadaamiya. Amaana: ɗá naba kezlanvekezle fidire na tá tsakaná emnde ɗanna, ⁵ antara kurávire na tá maganá itare, tá aɗkwa piyaterite dise jirire á Dadaamiya ge emnde na. ɗá kátá jema a eɗkale á emnde baɗemme, ɗá gaterve ba seke danɗay-aha, geni sey tá fansar ba ge *Almasiihu palle. ⁶ Ba máki ɗa nanna fesarfire á kure, kwa emnde umele wá, ɗere ɗá aɗkwa átekwa ge giya emnde na baaka fesarfire ázetare dekiɗeki na.

⁷ Kure kwá zhárá ba iga á duksa. Tá aɗkwa emnde umele am dágave á kure, ta bantsa itare ta emnde á *Almasiihu. A diyareddiye emnde ɗanna ba shagera ganakini iya keni ya ba ura á Almasiihu. ⁸ Yaakadada a vite hákuma áte kure. Amá a vite hákuma ɗanna geni yá

zadakurzáda an ñane ka, a vite ge dákurá á de katafke an ñane. Ma ya galante ire-aaruwa kwakya keni, baaka názu á emmága, adaba yá galaná an unjule-aara. ⁹ Amá bawánka zlaɓe a ba kure: Paul á kátá ganjerte ba lyáwa an elva na á tsakaná ñane am wakita-aara na. ¹⁰ Ta bántsa emnde umele á kure áte iya: Máki ya yiyiye an kure yá puwakurte nalmesheri wá, ya tsakakurse ba elva sadadde, antara elva-aha na zlazlada áte emnde na. Amá máki danemda am dagave á kure wá, yá gev ba seke baaka ura, ba seke yá ndaaka elva. ¹¹ Náwa elva na ña baterná ñere ge emnde ñanna; a cengarancena ba shagera: Bademme á názena ña puwakurtaa ñere na wá, má watse daneremda am dagave á kure keni, ña de maganá á ba áte una ñanna.

¹² Itare ta ganvaa ba itare ire-aatare ta male-aha. Daaci ña gergere an emnde ñanna, ñere ña sleka ire á ñere an itare dekideki. Itare wá, ta fanaa ba itare ire-aatare am malire, daaci tá zhára ire-aatare áte una tá slaslaná itare, daaci ta bantsaa itare ta male-aha. Ta uce-aha degi emnde ñanna. ¹³ Amá ñere wá, ña gáleka ñere ire áte naza-aatare na. Gála ire á ñere á tsaatse á ba áte slera na a fanjeraara Dadaamiya ge ñere, ña ebzeka nákwede dekideki. Slera na a fanjeraara Dadaamiya ge ñere wá, ña daada ádezekure an labáre á higa. ¹⁴ Daaci duwa á ñere ádezekure na ña dakuraa labáre á higa, elva a *Almasiihu na wá, ebzaneruka nákwede á una a kwaranersaa Dadaamiya dekideki. ¹⁵ Daaci estuwa, galanjerka ire áte slera á ura, adaba ebzaneruka nakwede á una a kwaranersaa Dadaamiya. Njá tama

kwá anƙwa á wálá ba lapiya am fetarfire, geni a farfe zlaɓe ádaliye slera á ñere am dágave á kure. Baɗemme á una ñanna, ebzañeruka nakwe ɗekideki. ¹⁶ Má zlañeruzle ázekure maa, lauktu bi watse ñá shá baráma a dá labáre á higa á dem larde na á katafke. Wayañerka ñere gev seke emnde umele, tá gálá ire áte slera á emnde na.

¹⁷ Anƙwa an puwa am wakita á Dadaamiya, a ba ñane: «Máki ura á kátá gálá ire wá, a eggálá aɗaba názena a maganaa Yaakadada.» ¹⁸ Aɗaba emnde na tá galaná ba itare ire-aatare ka una, tá de shá háyá áza Dadaamiya, sey emnde na ni a galateraa ñane.

11

Paul á tsáká elva áte emnde na ta bantsa itare ta emnde a bela

¹ Kina wá, yá ndaakur elva ba seke ura an shaitaine, amá naba fawifa ervaunɗe. Ba estuwa, naba fawifa ervaunɗe. ² Yá anƙwa á shelha jipu áte kure, ba seke náza á Dadaamiya kalkale. Zlaɓe ádaliye, kure kwa ba seke gyaale, vanakurteva ge *Almasiihu zlauzle, kwa ba seke gyaale a sheba-aara. Daaci yá kátá kwá njá an enƙale á kure, ɓaaka duksa mándzawe áte kure, dem sarte na ni watse ñá jakurmeje na.

³ Amá yá á ba an lyawa, geni bi watse kwá njeka á ba átuge Almasiihu palle, kwá de wayeka an ervaunɗe á kure palle, ire á kure á de gev bubuwa áte ñane. Amá yehauteyeha Hawwa, ñane keni ndza a baduwa záhe ba estuwa an yaimyaimire antara fida-aara. ⁴ Yá an lyawa

ba párákke áte kure. Adaba kure, ba a duhe ge ura ádezekure wallá slebela á Yaisu ka, uwe ka, waazu-aara áte ñane keni gergere tsa antara una kwa cenanaa ázeñere, shedekwe na ñane á maga slera an ñane keni gergere antara una kwa shanaa kure, aley kwa naba vante baráma ge ura estuwa. Shagera slera á kure!

⁵ Ay degiya, emnde ñanna ta bantsa itare ta emnde a bela baaka arge itare ñanna wá, diyandiya ganakini baaka názu ta jiwa an ñane.

⁶ Ambáne mbanka ndáhá elva emtake emtake. Amá diya wá, yá ankwá an ñane. Ba kure keni diyakurdiya diya-aaruwa, ya marakuránmárá ser kwakya am duksa bademme.

⁷ Am sarte na yá am dagave á kure, yá ankwá á balakurá labare á higa elva á Dadaamiya, ya magán ba dey, ndavanka duksa á kure dekideki. Ya naba gulaa ire-aaruwa, ya kakurte kure, geni kwá wálá an unñule-aara. Emtu badzanevbadze emtu?

⁸ Am sarte na yá ankwá á maga slera am dagave á kure, kwaye ndza ta veliyantaa emnde á Dadaamiya á sawa am tate umele shunngu. Una ñanna gevge ba seke ya zlaa ndzedá á emnde umele, mela wá, ya melakuru ge kure.

⁹ Am sarte na yá ankwá á maga slera am dagave á kure, ma yá an wedere á shunngu keni, ndavanka ya duksa á kure, kwaye ndza ta sinaa emnde á Dadaamiya na tá am kwará á Makiduniya náza a já wedere-aaruwa. Hyanakuraaka ya lyuwa dekideki an wedere á ire-aaruwa. De katafke keni yá hyakuraaka ya lyuwa. ¹⁰ Yá ndaakur adaba jirire á *Almasiihu na am iya na: Una ñanna názu yá gálá ire

átekwa. Am huɗe á Akaya baɗemme, ɓaaka ura á dzegwándzegwa piyitepiya. ¹¹ Emtu máki yá tsáká elva estuwa wá, wayanakurkire emtu? Una ka ɗekideki. Diyaadiya Dadaamiya ganakini wayanakurwáyire.

¹² De katafke keni yá liiyeka ya duksa á kure, ganakini a sharánka názena ni tá gálá ire átekwa emnde na ta bántsa itare ta emnde a ɓela, slera á ɗere ba palle, mbate fida na. ¹³ Emnde ɗanna ta emnde a ɓela á Yaisu *Almasihu ka ɗekideki. Itare ta emnde a zlerma, amá tá mareka jirire á slera-aatare, ta ganve ire-aatare ba seke ta emnde a ɓela. ¹⁴ Magauka najipu-aara. Afaba ba Shaitaine an ire-aara keni aɗkwa á magán ba estuwa, á ganve ire-aara ba seke malika á Dadaamiya. ¹⁵ Daaci una keni najipu ka. Emnde a slera-aara keni tá naba ganvege ire-aatare ba seke ta emnde a slera á Dadaamiya á jirire. Amá am halavuwa á duniya wá, názena tá aɗkwa á maganá itare na baɗemme watse tá de ebbera.

Paul á gálá ire an zlaɗa-aha-aara

¹⁶ Yá enndáhá zlaɓe ádaliye elva-aaruwa ɗanna ba seke ura an shaitaine na, amá wá, zharawika seke yá an shaitaine ba jire. Iya keni zharawizhára á ba an ice, yá galantegálá ire-aaruwa, seke una kwá aɗkwa á zharáterá á ba an ice emnde umele na. ¹⁷ Ge jirire wá, una namaari á Yaakadada ka. Ba daaci am gálá ire-aaruwa ɗanna wá, ganvege ba seke yá an shaitaine. ¹⁸ Yá zhára ba emnde kwakya tá aɗkwa á maganá á ba áte slera á duniya, tá gálá ire an ɗane na wá, daaci iya keni shagera yá

galantegálá ire-aaruwa. ¹⁹ Há! kwa bántsa kure kwa emnde a enkale tsa, aley kwá zharaterá á ba an ice emnde nanna tá an shaitaine na, baaka lámbe á kure! ²⁰ Tá ankwá á gakurve ba seke náve-aha-aatare, tá zákurá áte há, tá ankwá á zlermakurzlerma, tá ankwá á fakurar uksanwire, tá ankwá á magakurá palasa keni, aley kwá ndaaka elva! ²¹ Mbate n̄ere na n̄a gakurmarge na, a magan̄eraa ba baakire á hákuma á n̄ere ndza! Yawan̄erarye kwaye baakire á hákuma á n̄ere nanna.

Kina wá, yá ndaa elva ba seke yá an shaitaine: Ma edda-aara á gálá ire an uwe keni, iya keni yá naba gálá ire an duksa nanna. ²² Ta bántsa itare ta emnde á Ibrahimia; ay degiya, iya keni ya ba palle á emnde á Ibrahimia. Ta bántsa itare wá, ta Iserayiila-aha; iya keni ya ba ura *Iserayiila. Ta bantsa itare, ta eggye-aha á Ibrahimia; iya keni ya ba palle á eggye-aha á Ibrahimia. ²³ Ta bántsa itare, ta emnde a slera á *Almasiihu, amá janateruje ya. Un̄nule-aara ka tsa ndáhá una nanna, amá ba waya-aara. Ba parakke janateruje an wáva am slera á Almasiihu. Iya wá, ser kwakya tá ngud̄ingud̄a jauje ge itare; ser kwakya tá ziya an já; ser kwakya una shifa-aaruwa á ferta ba zlahhe na. ²⁴ Ser ilyebe Yahudiya-aha tá ziya an já, kurpe kul keye ju maselmane, kul keye ju maselmane. ²⁵ Ser keye tá ziya emnde a Rauma an zade; ser keye á puwán̄erá paare á dem háye; ankwá ser palle, ya vaha, ya háre am hud̄e á háye; ankwá ser palle, tá kátá já shifa-aaruwa emnde an nákwá. ²⁶ Zlabe ádalije, am shula-aha-

aaruwa, ser kwakya á magiyá palasa yawe á guwa, shanushe zlaɗa kwakya am erva á emnde a zá baráma, shanushe zlaɗa kwakya áza emnde a jeba umele, áza emnde a jeba-aaruwa keni ba estuwa. Magariyánmaga palasa am berni-aha, antara áte makwata-aha gergere, shanushe zlaɗa kwakya átira háye keni. Tá aŋkwa zlaɓe emnde na ta bantsa itare ta egdzar mama-aha á miya am fetarfire, amá ba fida. Ázetare keni shanushe zlaɗa kwakya. ²⁷ Máki ba wáwa an slera ŋanna wá, ya wáwa. Shanushe zlaɗa an tsáká ire. Am sarte umele ba háre keni, yá taa puka ɗekideki. Am sarte umele, ma ɗafa, ma yawe keni, ádeteka áte we-aaruwa ɗekideki, yá nja-aaruwa ba estuwa. Am sarte umele ba sarte ge zu ba duksa ŋanna keni ɓaaka. Shanushe wahála á lailaidɗire keni kwakya, antara zlaɗa á ɓaakire á kacekaca áte vuwa.

²⁸ Zlaɗa-aha-aaruwa umele keni zlaɓe aŋkwa ba kwakya, amá yá tsanƙa mazla-aara. Duksa palle yá aŋkwa á shuŋŋulaná ya wá, yá shuŋŋula ba emnde a fetarfe, ma vaatara keni yá dzámá ba itare. ²⁹ Máki yá zhára tsaftsafe ndzeɗa á palle-aatare, yá tapán ba seke áte ya. Sakwa máki mbeɗaambeɗa palle-aatare á dem haypa wá, á wiwa jipu ba seke áte ya.

³⁰ Daaci máki yá gálá ire wá, yá galaná áte názena ni á mára ɓaakire á payɗa-aaruwa. ³¹ Dadaamiya Eddenara ge Yaakadada Yaisu wá, diyaadiya jirire-aaruwa baɗemme. Galaumigálá ba ŋane ma vaatara keni. ³² Aŋkwa zlaɓe ádaliye zlaɗa palle ya nanaa ya am Dimaska am

sarte na yá áhuwa: Am sarte ñanna wá, ndza á kwaraná Araitas larde-aatare. Slekse yaikke na a fanaa Araitas am Dimaska, a naba bazlaa sawji-aha áte we á wakyiya-aha á ukvake ge tsagwaditságwada. ³³ Amá ta naba ñjimhe am ílila emnde a fetarfe, ta ñgudíte áte zává-aha, daaci ta naba velise á kya biye á ukvake á sete iga a ekse. Ta fertiyaa estuwa emnde a fetarfe átuge slekse á larde ñanna.

12

Paul á gálá ire áte názena a marannaa Dadaamiya

¹ Ura-ara keni ba yá eggálá tsawe ire ñanna wá, zlaɓe yá aɓkwa átekwa, ma shagerka gálá ire keni. Kina wá, yá ndaha elva a názena a marinaa Dadaamiya, antara wahayu-aha na ya shanaa ya baɗemme. ² Aɓkwa slefetarfe umele ya disaa iya wá, ndza dánda Dadaamiya á dem mba-aara am samaya. Una yá ndaaná á ba áte ire-aaruwa. Yawe kelaawa ju ufaɗe vatena a mágava duksa ñanna. Una ma am shene, ma ba jirire keni, diyaa ba Dadaamiya palle. ³ Yá enndáhá zlaɓe ádaliye: Edda-aara ñanna ndza dánda Dadaamiya á dem zlanna-aara. Una ma am shene, ma ba jirire keni, diyaa ba Dadaamiya palle. ⁴ Aɓkwa elva-aha ya cenanaa am zlanna, amá á ndaaveka an elva á emndimagwaha ɗekiɗeki. Zlaɓe ádaliye ba enndáhá-aara keni an piya. ⁵ Daaci mákí yá gálá ire wá, yá galaná áte jeba á iya ñanna. Máki áte ire-aaruwa na náwa iya na wá, yá gáleka ire

dekideki. Má uneka maa, yá gálá ire-aaruwa áte názena á mára baakire á payda-aaruwa. ⁶ Má wayanwáyá wá, ba iya na náwa nane na keni, á jeviyaaka názena ni yá galantegálá ire-aaruwa átekwa. Yá gevka seke ura an shaitaine, adaba yá de gáleka ire am fida ba dey. Amá yá manka una, yá kuva a kariteka emnde kwakya adaba gálá ire na ta cenanaa itare am mbuwe-aaruwa. Amá yá kátá emnde tá fá zherwe áte ya adaba názena ta nanaa itare am nja-aaruwa, antara jirire na ta cenanaa ázerwa bademme.

⁷ Ma andze yá naba demda am kuravire yaikke adaba názena ya nanaa ya am mba á Dadaamiya. Amá Dadaamiya a naba magaa pute á kya erva an Shaitaine wá, ya shaa lapikere umele wá, ba seke tá wawiya á ba an sera am vuwa, á wiwa jipu. Ba kelaa má tsetse lapikere-aaruwa nanna wá, yá maga ba palasa. Adaba una nanna, baaka kuráviere ázerwa. ⁸ Ya magaa maduwa ser keye ádeza Yaakadada, geni a halisehále lapikere nanna am vuwa, ⁹ amá a nwiyante, a ba nane: «Yá magaká ngurna ba ge ebbásha-aara. Adaba má baaka payda á ura, hákuma-aaruwa á márava kwakya am edda-aara.» Daaci kina wá, emtake ervaunde-aaruwa jipu, yá gálá ire áte baakire á payda-aaruwa, a njinja ba hákuma á Yaakadada am ya. ¹⁰ Adaba una nanna, am baakire á payda-aaruwa nanna, amá ervaunde-aaruwa ba seke nama. Ma tá zlazlízle emnde, ma tá fá zlada-ara áte ya, ma a shiyaa lámare-ara, ma yá maga palasa á uwe keni, baaka lambe-aaruwa dekideki. Diyandiya

ganakini a shiyaa zlada ḡanna adaba zhera á *Almasiihu. Adaba am sarte na ni baaka ndzedfa am ya dekideki na wá, yá shá ndzedfa á jirire keni á ba am sarte ḡanna.

¹¹ Ya tsakese elva ba seke ura an shaitaine, amá kwa maganaa ba kure. Adaba ma andze kwá maganá kure seydire áte ya, tara hyainephye ura, an hyainepka ura keni. Ma hyainepka ura keni wá, janerammeka an male-aha á kure ḡanna ta bantsa itare ta emnde a bela na.

¹² Adaba uwe, am sarte na yá am ekse á kure wá, ndza fanefa ervaunḡe jipu, Dadaamiya keni maganaamaga najipu-aha gergere á kya erva an ya, marsemare ba parákke ganakini ya slebela á ba an jirire. ¹³ Emtu anḡkwa shagerire na ya magaterán ge emnde umele, kwalanevkwále ge magakurán ge kure emtu? Baaka dekideki, kure keni yanakuraaka ya. Duksa palle maganka ázekure wá, fanakurarka pelá mbera-aaruwa. Daaci yá an badza ba iya, yawiyarye haypa-aaruwa!

Paul á dzámá emnde a fetarfe na tá am Kaurintus

¹⁴ Kina wá, magannaamága niya a dezekure ge keyire. Amá wá, yá de fakurarka pelá mbera-aaruwa. Tatayanka ya shunḡu á kure, iya yá kátá ervaunḡe á kure. Egdzara wá, tá gelaná itare ka emnde a há, amá tá gelaterá emnde a há itare. ¹⁵ Iya wá, yá wawakuruwawe an ndzedfa-aaruwa bademme; ma ya kedfaa nalmane-aaruwa antara ire-aaruwa bademme adaba kure keni ba emtake. Emtu watse

kwá gulanaagulá wáyáva á kure áte iya adaba wayanakurwáyá kwakya emtu?

¹⁶ Náwa bademmire á miya diyamidiya ganakini ndavanakuruka mbera-aaruwa. Ay labára zlabé, ta bantsa emnde umele á kure: Sleyaimyaimé Paul, a zu shungu á miya á ba an zlerma. ¹⁷ Ya zlermakuraa estara? Ta de zlermakuraa emnde na ya belateraa ya ádezekure na emtu? Puwaupuwa sawari am ire á kure ba shagera. ¹⁸ Tara Titus tá antara egdza emmemiya umele na ba kure keni diyakurdiya, ya belateraa ya ádezekure na wá, ta de zlermuwa itare duksa á kure emtu? Tamanka una dfekideki. Nere antara Titus wá, ña ba palle am slera á ñere, enkale á ñere keni ba palle.

¹⁹ Bawánka zlabé a ba kure, ñá kátá lya ire á ñere an elva na ñá tsakaná ñere kinekineka na. Ña emnde á *Almasiihu wá, estuweka. Elva na ñá tsakaná ákatafke á Dadaamiya. An elva ñanna ñá tsakaná ñere bademme na wá, ñá kátá ba farfe á kure am elva á Dadaamiya, egdzar mama-aha-aaruwa. ²⁰ Lyawa-aaruwa kina wá, yá kuva ba ni bi watse yá de berakurka áte una yá kataná ya. Daaci kure keni kwá de hayiika am nja-aaruwa. Á njeka ervaunde-aaruwa, yá dzámá bi watse yá de berakurá am dágaldagala, kwá ankwá á shelha am dágave á kure, kwá ankwá á maga ervaunde, gergere ye á kure bademme, kwá ankwá á zlazlava, kwá ankwá á za vuwa á emnde, kwá ankwá á maga kurávire, bademme á duksa á ba an wésa. ²¹ Yá an lyawa jipu, yá kuva bi má danduwa ádezekure, kwá de fiyemfa am zherwe yaikke á katafke

á Dadaamiya-aaruwa. Yá an lyawa jipu, yá dzámá bi watse yá bera emnde á kure kwakya mbaɗarmbáɗá á dem haypa, amá eptsarka am tuba, zlaɓe tá maga ba názu zlayeka ɗekideki, tá maga ba dákárire, antara zawarire-aatare. Máki ya de berakur estuwa wá, watse yá kyuwa jipu.

13

Elva-aha na á zle átekwa

¹ Náwa watse yá duwa ge keyire á dezekure. Ba seke una ni aɗkwa an puwa am wakita á Dadaamiya, «geni shairiya á ura, sey tá kyáná áte seydire á emnde, cekwa-aara seyde-aha buwa bi keye na wá,» emnde na tá yánka mága mándzawire na keni, mí de kya shairiya-aatare á ba áte una ɗanna. ² Am sarte na ya dezekure ge buwire keni, ndza ya fater elva-aaruwa palle ge emnde ɗanna kwásau yaránka maga haypa na, ya ndaater ge emnde umele keni baɗemme. Kina ya yiyiye an kure keni, yá aɗkwa á ndaakurndáhá zlaɓe áɗaliye ba parakke: Má watse danemda ya wá, watse baaka zatervaare ge emnde ɗanna ɗekideki. ³ A ba kure keni, kwá kátá dise *Almasiihu, máki á maga slera am elva-aaruwa, watse kwá nanna degiya! ɗane wá, gavka ura cekwa payɗa-aara. Ba kure keni diyakurdiya hákuma-aara na á maganá ɗane am kure. ⁴ Am sarte na ta zleɗelanaa áte dzangala wá, ba jirire ndza baaka payɗa-aara. Amá an hákuma á Dadaamiya wá, á ba an shifa-aara. Ay degiya, ɗere antara ɗane gaɗerevge ba palle. Daaci ɗere an ire á ɗere wá, baaka payɗa

á ñere. Amá ma watse dañeremda ádezekure wá, watse kwá de nanna hákuma á Dadaamiya an ñere, am slera na njá de maganá ñere am dágave á kure. Adaba gañerevka an ire á ñere, aṅkwa Almasiihu antara ñere.

⁵ Amá njawinja emtsaade kure am áhá, habazauhábaza názu am zlalava á kure, diyaweddiye máki ba jirire kwá á ba am fetarfire. Ge jirire wá, baaka shaige-aara, diyakurdiya ganakini aṅkwa *Almasiihu am kure. Sey máki aṅkwa názu a mbedakuraa áte baráma-aara. ⁶ Amá keni yá tama á de jakurviyaaka, kwá de ba eddiya ganakini ñere ña emnde a bela á jirire. ⁷ Amá ñere wá, ña baaka an wedere á marakurá názena ma andze kwá diyañersá átekwa ganakini ña emnde a bela á jirire. Názena njá yekaná ñere áza Dadaamiya wá, yawánya mága mandzawire bademme. Ma shañeránka ñere mazla-aara marakurá názena ma andze kwá diyañerse átekwa keni, baaka lambe á ñere. Ñere njá kátá ba kwá maga shagerire. ⁸ Adaba njá taa yanaaka jirire, ñere keni njá maga ba slera á jirire ñanna. ⁹ Máki hyakurephya kure emnde am elva á Dadaamiya wá, ma marápseka hákuma á ñere mazla-aara keni, ñere njá higa ba jipu. Daaci njála á ñere kina áza Dadaamiya wá, a gakurvege emnde na ni baaka duksa mándzawe áte itare dekideki na.

¹⁰ Wakita ñanna yá aṅkwa á puwakurtá ya kina, ya yiyiye an kure na wá, ba geni kwá eptseptsa am tuba, daaci yá de valakurarka mázla-aara. Hákuma wá, viteva Dadaamiya

áte kure. Amá wá, a vite hákuma ñanna ge zadakurzáfeka, a vite ge dákurá á de katafke an ñane.

Halavuwa á elva an gá use

¹¹ Daaci a jamima shifa kwa egdzar mama-aha-aaruwa. Wavauwáva, gawansege duksa mándzawe am zlááva á kure bademme. Yawanaaka elva-aaruwa na, a deska am ire á kure. Njawinja á ba áte ye palle, magauka názena á de sakurá dágala na. Daaci á de yakuraaka Dadaamiya na edda á wáyáva ba ñane palle, á vatertá ba ñane hairire ge emnde na.

¹² Gauga use-aaruwa ba shagera am dágave á kure, kwa emnde á Dadaamiya bademme. Bademme á emnde a fetarfe na tá áhuna keni, tá aṅkwa á gakur use-aatare. ¹³ A melakurumela Dadaamiya, ganakini kwá shánsha ṅurna á Yaakadada Yaisu *Almasiihu ma vaatara keni, kwá shánsha wáyáva na a wayamiyaa Dadaamiya an ñane na am kure. A janmeje Shedefkwe Cufedfe ye á kure bademme.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d